

大乘三聚懺悔經

定九

隋天竺三藏闍那崛多及笈多等譯

如是我聞一時婆伽婆在毗舍黎大光明林  
與大比丘衆千餘人俱復有無量諸菩薩等  
爾時世尊與於無量百千諸衆前後圍遶而  
爲說法爾時長老舍利弗在彼會坐承佛威  
神從座而起偏袒右肩右膝著地合掌向佛  
而作是言我於今者欲有所問願佛聽許爲  
我解釋爾時佛告舍利弗言汝舍利弗恣汝  
所問我當解釋令汝心喜爾時長老舍利弗

蒙佛聽許解釋所問歡喜踊躍不能自勝以  
歡喜意而白佛言大德世尊若善男子善女  
人等云何欲住於聲聞乘辟支佛乘及住大  
乘是衆生等有諸業障云何懺悔云何發露  
謂煩惱障諸衆生障法障轉後世障云何懺  
悔云何發露爾時佛告舍利弗言善哉善哉  
汝舍利弗汝今欲爲多所安樂利益天人能  
問如來於如是事汝舍利弗汝今應當諦聽  
諦聽善思念之當爲汝說時舍利弗而白佛  
言善哉世尊唯願解說爾時佛告舍利弗言

汝舍利弗若善男子善女人等若欲發心住  
於聲聞辟支佛乘若住大乘是衆生等應於  
晝夜各在三時從座而起偏袒右肩右膝著  
地合十指掌應作是言所有現在十方世界  
諸佛世尊常住在世若坐經行是諸世尊常  
憶念我當證知我爲我作眼爲我作智爲我  
作勝爲作最極我在彼前懺悔發露若我無  
始流轉往來若我此生若於餘生所有業障  
若自作若教他作見作隨喜及煩惱障諸衆  
生障法障轉後世障若自初作若教他初作

若見初作隨喜若自正作若教他正作若見  
正作隨喜若自作竟若教他作竟若見他作  
竟隨喜若復未識佛時未識法時未識僧時  
未知善時未知不善時若復隨順於欲瞋癡  
貪亂心等而起諸惡若復爲於睡眠所覆若  
復掉戲若復疑惑若復諂曲若復無漸無愧  
若復我慢貢高自大若起怨嫌若醉放逸若  
起惡心出佛身血若謗正法破和合僧殺阿  
羅漢或殺父母如是等業若自初作正作作  
已若教他作見作隨喜身業三種口業有四

定九

二

意三業行於衆生所起諸惡意或復逼觸毀辱呵罵三乘衆生說其過惡嫌恨誹謗或作邪淫或作邪見若初始作若正作時若復作已自作教他見作隨喜或隨所說違背戒聚或盜塔物起於邪見若始發意或復作時及作已竟如是等惡自作教他見作隨喜或於父母而起違背或障人出家或復欲受具戒之時爲作衣服留礙或入禪定時或正念時而作障礙或於利養名聞善根而爲障礙如是等事初作作時及已作竟自作教人見作

隨喜如是一切所作衆惡今於一切佛世尊前發露懺悔爲證明我與我作眼與我作智與我作勝與我作極今於一切佛世尊前至心懺悔發露不敢覆藏於未來世更不敢作而今一切諸佛世尊已知見我攝受證明若我所有無始生死諸煩惱中流轉往來所作惡業自作教他見作隨喜如是等業應受惡報若復現受若當來受如是諸業諸佛世尊當證知我如對目前與我作勝與我作極於諸佛前至心懺悔不敢覆藏於未來世更不

敢作所有過去有諸如來正遍知者如彼往昔行菩薩行時懺悔業障及煩惱障諸衆生障法障轉後來世障如是懺悔我今亦復如是懺悔不敢覆藏於未來世更不敢作所有未來世諸佛如來正遍知者如彼當行菩薩行時懺悔業障煩惱障諸衆生障法障轉後世障懺悔已復懺悔我今亦復如是懺悔諸障發露懺悔不敢覆藏懺悔已後更不敢作所有現在十方世界一切世界有諸如來正遍知者現住在世如彼往昔行菩薩行時懺

悔業障煩惱障諸衆生障法障轉後來世障懺悔已復懺悔我今亦復如是懺悔業障煩惱障諸衆生障轉後來世障懺悔發露不敢覆藏於未來世更不敢作如是過去未來現在諸佛如來正遍知者若已現知若有當知我今爲於業障所覆應墮地獄畜生餓鬼若閻羅王世界違背遠離佛法僧處墮於逼迫苦惱之處如是等障今於一切佛世尊前發露懺悔願佛世尊當證知我爲最勝者爲最極者我於彼前皆悉志心發露懺悔不敢覆

藏於未來世更不敢作我今於此志心懺悔  
我及衆生願智清淨諸法業障當淨一切助  
菩提法願皆滿足如是三發於如是願如過  
去諸佛如來正遍知者彼等世尊於往昔行  
如是懺悔如是懺已得一切法無障清淨若  
未來世諸佛如來正遍知者彼諸世尊亦當  
如是懺悔所有現在十方世界一切世界諸  
佛業障已得一切法無障清淨如來正遍知  
者現住在世彼佛世尊往昔修行亦皆如是  
懺悔業障得一切法無障清淨舍利弗以是

定九

四

之故若善男子及善女人若欲發住於聲聞  
乘辟支佛乘若住大乘欲淨業障應當如是  
懺悔發露不應覆藏於未來世不應復作舍  
利弗若有善男子善女人欲離地獄畜生餓  
鬼貧賤生者亦當如是懺悔發露不應覆藏  
於未來世不應復作舍利弗若善男子善女  
人欲生刹利大姓婆羅門大姓居士大家受  
富樂果若復欲生四天王處三十三天夜摩  
天兜率天化樂天他化自在天梵身天梵輔  
天梵侍天大梵天淨居天少淨天無量淨天

遍淨天大身天小身天無量身天廣果天無  
想天光音天無惱天善見天阿迦尼吒天無  
邊空處天無邊識處天無所有處天非想非  
非想處天若欲生彼同受果報應當如是懺  
悔業障如是發露不應覆藏後不更作是故

完九

五

舍利弗欲得須陀洹果斯陀含果阿那含果  
阿羅漢果辟支佛道亦當如是懺悔發露淨  
於業障後不更作舍利弗若有善男子善女  
人欲當成就成無上菩提一切種智智不可  
稱智一切三界最勝妙智亦應如是懺悔發

露後不更作應如是知如來所說一切諸法  
從因緣有或有生滅過去已滅未來未至現  
在無體無有業障無業障處現作諸行亦無  
業障所以者何如來常說一切諸法空無我  
所無有衆生無有命者無福伽羅無有人者  
無摩那婆本性空寂以是義故一切諸法無  
有業障舍利弗若善男子善女人等若當能  
入如是等際所謂實際無我之際無有家際  
無漏際者是則能淨一切法障而得寂靜於  
是舍利弗白佛言世尊是住大乘發菩薩心

言善男子善女人等云何當應隨喜一切衆生善根佛告舍利弗是住菩薩乘善男子善女人等應晝三時及夜三時從座而起偏袒右肩右膝著地合十指掌應作是言一切世界所有衆生衆生所攝彼等所有諸福德聚若初作若正作若作已若自作若教他作見作隨喜若於佛邊若於法邊若於僧邊若福伽羅邊若行布施福事持戒福事若等行福事彼等我今皆悉隨喜最勝隨喜最大最妙最極最淨無等無等等無上無上上諸佛許

可我今應當如是隨喜所有過去諸佛如來正遍知者從初發心乃至入於無餘涅槃於其中間所有福聚彼等我今皆悉隨喜所有未來十方世界諸世界中當有如來應供正遍知從初發心所有修行六波羅蜜和合福聚彼等一切我今皆悉如是隨喜乃至如於諸佛許可隨喜隨喜若復現在一切十方諸世界中有諸如來應供正遍知從初發心乃至得阿耨多羅三藐三菩提已乃至入於無餘涅槃於其中間所有福聚我今皆悉如是

定九

六

隨喜最勝隨喜乃至如佛許可隨喜如是隨喜舍利弗於意云何如是隨喜和合福聚得幾功德有大利益舍利弗若此三千大千世界所有衆生衆生所攝彼等一切成阿羅漢若有善男子善女人供養彼等恭敬奉事給施衣服飲食湯藥牀敷等事乃至命終彼所得福寧爲多不舍利弗言甚多世尊佛言舍利弗且置三千大千世界諸衆生等衆生所攝若復東方如恒河沙諸世界中所有衆生衆生所攝者彼等皆得成阿羅漢若有善男

子善女人乃至盡命供養供給乃至湯藥是等諸事舍利弗於汝意云何彼所得福寧爲多不舍利弗言甚多世尊佛告舍利弗如是南方西方北方四維上下恒河沙等諸世界中所有衆生衆生所攝皆成羅漢若有善男子善女人等盡形供養奉事供給乃至衣服湯藥等事彼所得福寧爲多不舍利弗言甚多世尊不可思議能得邊際佛告舍利弗若住大乘發菩薩心諸善男子善女人等能有正信無諸諂曲發阿耨多羅三藐三菩提心

定九

七

復能如是隨喜隨喜舍利弗比前福德於此  
福聚百分不及一千分百分億分百億分  
乃至算數譬喻所不及一舍利弗諸菩薩等  
如是隨喜能具足故能速成就阿耨多羅三  
藐三菩提舍利弗若有善男子善女人住於  
大乘復能如是隨喜隨喜當得如是無量無  
邊大福德聚舍利弗若有婦人厭惡女身欲  
求男身當成就阿耨多羅三藐三菩提亦應  
如是隨喜隨喜爾時舍利弗復白佛言唯願  
世尊爲我廣說勸請和合所得福聚利益安

樂諸天世人亦爲現在及未來世諸菩薩等  
攝受廣大諸善根故爾時佛告舍利弗言善  
哉善哉舍利弗汝今欲爲多所利益安樂天  
人能問如來如是之義舍利弗汝今諦聽善  
思念之當爲汝說舍利弗言善哉世尊我今  
欲聞願爲解說佛告舍利弗若有善男子善  
女人等住大乘者應於晝夜各在三時從座  
而起偏袒右肩右膝著地合十指掌應作是  
言諸佛世尊當憶念我所有十方一切世界  
所有諸佛如來應供正遍知證菩提已欲轉

法輪我今悉皆勸請彼等諸佛世尊皆悉願轉無上法輪爲欲憐愍安樂利益諸天人故如是三說亦復如是我今勸請諸佛世尊唯願爲轉無上法輪唯願彼等諸佛世尊施於法施願佛世尊普設法會願諸世尊注大雨願諸世尊然大法炬願諸世尊擊大法鼓願佛世尊作法音樂願諸世尊吹大法螺願諸世尊建立法幢願佛世尊以法充足一切衆生令諸衆生以法自恣多所利益安樂世間憐愍一切諸天人故又舍利弗若善男子

善女人等欲當成就阿耨多羅三藐三菩提者應晝三時及夜三時偏袒右有右膝著地合十指掌而作是念所有十方一切世界所有一切諸佛世尊現住在世若住若行應當憶念應當禮敬應作是念所有現在十方世界諸佛世尊欲捨壽命入涅槃者我皆勸請諸佛世尊莫入涅槃久住於世不思議劫不可說無有量不可稱劫爲多利益安樂世間諸天人故堪忍久住無令身心而有疲倦如是三請諸佛世尊久住於世於無量劫利益

安樂一切世間諸天人故堪忍久住勿令身心而有疲倦如是勸請彼所善根應當迴向阿耨多羅三藐三菩提舍利弗汝今當觀勸請迴向得幾許福舍利弗於汝意云何若此三千大千世界滿中七寶持用布施諸佛如來其所得福寧爲多不舍利弗言甚多世尊非所思量之所能知佛告舍利弗且置三千大千世界滿中七寶如是東方南西北方四維上下諸世界中滿中七寶持用布施諸佛如來其所得福寧爲多不舍利弗言甚多世

定元

九

尊非可思量能得邊際舍利弗汝今當觀若善男子善女人等正信無諂能發無上菩提之心能作如是勸請諸佛轉於法輪舍利弗如此福聚比前福聚百分不及一千分百千分不及一乃至算數譬喻所不能及舍利弗若善男子善女人等發菩提心能作如是勸請迴向和合善根能具足者當速成就無上菩提舍利弗我於往昔行菩薩行時亦常如是勸請諸佛轉於法輪及久住世我以如是勸請諸佛轉法輪故因彼善根因緣之力是

故今者帝釋天王諸梵王等恭敬合掌而勸  
請我轉於法輪而作是言唯願世尊多所憐  
愍安樂饒益一切世間諸天人故轉於法輪  
舍利弗我於往昔行菩薩行時勸請諸佛久  
住於世轉法輪故今得十力四無所畏四無  
礙辯大慈大悲十八不共法我涅槃後正法  
當住於五百歲像法亦復住五百歲爾時舍  
利弗復白佛言大德世尊是住大乘諸善男  
子善女人等於阿耨多羅三藐三菩提善根  
云何迴向爾時佛告舍利弗言汝舍利弗是

住大乘若善男子善女人等應晝三時及夜  
三時從座而起偏袒右肩右膝著地合十指  
掌應作是言我於無始生死流轉已來至於  
今日所有福聚自作教他見作隨喜或於三  
寶福伽羅所修諸福德若修布施若行持戒  
諸福德事若復等行諸福德事若復思念作  
福德事乃至於今懺悔隨喜勸請等事一切  
和合皆悉迴向施與一切諸衆生等如於過  
去諸佛如來應供正遍知者往昔所行菩薩  
行時以諸善根皆悉迴向於一切智我今亦

定九

十

復如是迴向以諸善根皆悉迴向無上菩提  
所有未來諸如來等正遍知者如彼當行菩  
薩行時以諸善根當以迴向於一切智我今  
亦復如是迴向以此善根皆悉迴向無上菩  
提所有現在十方世界諸佛如來正遍知者  
現住在世自在行者如彼往昔行菩薩行時  
以諸善根皆悉迴向無上菩提我今亦復如  
是以諸善根皆悉迴向無上菩提如彼世尊  
釋迦牟尼如來應供正遍知坐於道場菩提  
樹下以不思議不可稱量廣大無垢如是智

印住佛三昧一念和合相應智慧降魔波旬  
軍力退已於夜後分明相出時應所知見皆  
悉正覺得正覺已於波羅柰鹿野苑中轉於  
無上四諦法輪若有沙門若婆羅門若天魔  
梵及餘世間所不能測然法炬擊法鼓吹法  
螺建法幢雨法雨以法充潤一切衆生多所  
憐愍利益安樂諸天人故亦如彼等阿闍如  
來阿彌陀佛師子佛百焰佛放焰佛熾盛光  
佛無邊光佛蒙恩光佛燈王佛最上佛蓮華  
上佛開敷佛寶月佛寶焰佛無礙光佛彌留

永樂北藏

大乘三聚懺悔經

第七六冊

幢佛寶相佛大焰聚佛寶幢佛因陀羅幢佛  
寶軸佛栴檀香佛決定焰波頭摩蓮華熾盛  
身佛無量名稱功德光明佛如彼彌留孤知  
如來應供正遍知如是等諸佛如來應供正  
遍知證於無上佛菩提已轉於無上最大法  
輪我亦如是願當轉於無上法輪願以法施  
一切衆生充足自恣爲欲利益安樂世間諸  
天世人作利益故舍利弗若有得聞如此所  
說第一之道聞已信受隨教行者彼則當得  
無量福聚舍利弗若善男子善女人等聞於

如是三聚法本受持讀誦能解其義爲他廣  
說彼則當得多福德聚不可思議不可稱量  
舍利弗汝今當觀如是無量神通福聚舍利  
弗於汝意云何於此三千大千世界所有衆  
生衆生所攝皆令彼等悉得人身得人身已  
成辟支佛若善男子善女人等盡形供養飲  
食衣服牀卧湯藥種種諸事彼涅槃後起舍  
利塔高十由旬縱廣正等滿七由旬妙色莊  
嚴端正可喜金銀瑠璃玻璃真珠碼瑙琥珀  
衆寶所成又復供養彼諸塔廟以天音樂散

妙華鬘燒香塗香繒幡幢蓋而以供養彼所得福寧爲多不舍利弗言甚多世尊不可思議之所能及佛告舍利弗且置三千大千世界諸衆生等衆生所攝又復東方如恒河沙等諸世界中所有衆生衆生所攝南西北方

定九

十二

四維上下如是世界所有衆生衆生所攝皆今彼等悉得人身得人身已證辟支佛若善男子善女人等乃至盡命供養奉事衣服飲食湯藥牀卧種種諸事供養供給彼所得福寧爲多不舍利弗言甚多世尊非可思量之

所能及佛告舍利弗若善男子善女人等能具正信無有諂曲發於無上菩提之心復能依此迴向迴向舍利弗比前福德於此福聚百分不及一千分百千分乃至算數譬喻所不能及爾時衆中有十千人從座而起偏袒右肩右膝著地合掌向佛而白佛言大德世尊我等亦欲當成無上諸佛菩提所以者何大德世尊我等以聞如是等法修多羅故深起愛樂大德世尊我等志樂無上菩提時天帝釋與諸眷屬六萬八千天衆圍遶即以諸

天曼陀羅華栴檀栴香閻浮金粟優鉢羅華  
波頭摩華俱牟頭華分陀利華供養於佛及  
此所說三聚法本而散其上再三散已而白  
佛言希有世尊乃至如此三聚法本多所利  
益為諸菩薩摩訶薩等當淨一切諸法業障

定九

十三

當令值遇一切善法具足成就佛告帝釋如  
是如是憍尸迦我今說此三聚法本為諸菩  
薩摩訶薩等多作利益於一切法無障清淨  
得成就故當得值遇一切善法悉成就故憍  
尸迦我念往昔阿僧祇劫復過是數不可思

量彼時有佛出興於世名大焰聚如來應供  
正遍知明行足善逝世間解無上士調御丈  
夫天人師佛世尊憍尸迦彼大焰聚如來壽  
命六萬八千億歲初會百千諸聲聞眾第二  
會有九十九億諸聲聞眾第三會有九十八  
億諸聲聞眾憍尸迦彼大焰聚如來為諸天  
人大作利益時彼眾中有一女人名曰尊親  
於彼會坐從彼大焰聚如來聞於如此三聚  
法本信受讀誦廣為人說如說修行發於無  
上菩提之心彼聞此法即轉女身成丈夫身

常得生於天人之中往來流轉當得受於八萬四千轉輪王身今現住彼在於東方去此佛刹過億百千諸佛刹土現成阿耨多羅三藐三菩提名寶焰聚如來應供正遍知憍尸迦若有衆生臨命終時聞彼寶焰聚如來名號能憶念者彼當不復更受女身所以者何彼寶焰聚如來往昔行菩薩行時發如是願若有女人臨命終時聞我名字能憶念者彼當不復更受女身憍尸迦此三聚法本能有如是多作利益爲諸菩薩摩訶薩等具足當

淨一切諸法諸障礙業當得值遇一切善法成就具足佛說此經時帝釋天王及長老舍利弗及諸天龍乾闥婆阿修羅人非人等聞佛所說歡喜奉行

大乘三聚懺悔經